

Papua Niugini: Prosekyut Domestik Vailens

Ol meri i no save kisim luksave olgeta taim, Lusim ol na ol i no save kisim ol sevis, Pusim ol long wanbel wantaim husat paitim o bagarapim ol

(Sidni) – Ol meri na ol pikinini meri long [Papua Niugini](#) i bungim ol nogut birua we ol man bilong ol i paitim ol, olsemna ol opisa bilong gavman i no save luksave long sefti bilong ol, ol sevis, na jastis, Human Raits Wats i tok long nupela ripot i kamap tude. Ol strongpela rot long luksave bilong ol pipel i abrusim birua o suvaiva, olsem long lukautim ol na gat hap bilong slip, i no redi na stap o i nogat olgeta bikos ol i no karim aut wok bilong ol.

Long Septemba 2013, palamen bilong Papua Niugini i pasim dispela Famili Proteksen Ekt, wanpela lo i kamapim ol nupela penalti bilong famili vailens, na kamapim nupela rot, olsem ol polis yunit, long lukautim na helpim ol pipel i bungim birua o ol viktim long famili vailens. Moa olsem tupela yia pinis, ol i no karim aut lo yet. Gavman i tok ol i no inap karim aut dispela lo inap ol i pinisim olgeta regulesen, we dispela em lo i no askim.

‘Mipela i harim ol nogut stori long planti ol meri,’ [Heather Barr](#), sinia risetsa long ol rait bilong ol meri long Human Raits Wats i tok. ‘Ol meri i soim mipela ol mak bilong sua, we ol i bin katim ol wantaim ol naip, senisim ol bun bilong ol, brukim tit bilong ol, na tok bihain ol i save go bek long ol man bilong ol i save paitim ol bikos ol i no gat narapela hap long go.’

Dispela 59 pes ripot, [Bashed Up: Family Violence in Papua New Guinea](#),’ i gat ol pepa bilong ol sistem i no wok gut long ol rot we gavman i save helpim ol domestik vailens – ol wok i no kamap gut we ol i no save lukautim ol meri gut na ol man bilong ol meri i save go het long paitim ol, taim ol i save mekim bikipela wok long painim helpim na jastis.

Human Raits Wats risets i soim olsem ol polis na ol prosekyuta i no save bihainim ol kriminel sas egensim husat man i save paitim meri bilong en, long ol bikipela kes tu. Polis i save askim mani long ol meri i kisim bagarap bihain long ol i ekt o ol i no save bisi long ol kes i kamap long rurel eria o bus ples. Polis i save les long salim husat meri i abrusim birua i go long hap bai ol i kisim lukautim, na husat i abrusim birua long painim oda bilong lukautim em, planti taim ol i no save hariap long ol kot. Dispela ol wok i no kamap gut i save sampela taim, save kamap long ol speselais famili vailens polis yunit.

Taim ol polis i stap insait, ol i save tingting long stretim hevi i kamap we ol i no save sasim ol, tasol long givim skul toktok long man bai stopim vailens o pait na salim meri i go long haus – long ol kes we klostu man i kilim meri o reip pasin, na taim meri i no pilim seif long go bek, i les long wanbel, na askim ol long kalabusim man i paitim em. Olsem piksa, Jenelle husat i gat 39 krismas i tokim Human Raits Wats olsem em i go long polis 17 taim na askim ol polis long kalabusim man bilong en tasol ol polis i les.

‘Ol pipel i kisim bikipela bagarap long domestik vailens long Papua Niugini i painim helpim long polis, yet ol i no save luksave long ol, o polis i save tokim ol long go bek long ol man bilong ol,’ Heather Barr i tok. ‘No gat helpim long polis, ol meri i save lusim rong bilong ol man bilong ol husat i save paitim ol.’

I gat bikpela wari long sait bilong sevis bilong ol meri husat i abrusim birua long man bilong ol we i no inap. I no gat planti hap bilong slip, nogat ol saveman bilong kaunseling na nogat helpim long sait bilong lo. I nogat wanpela seif hap bilong ol meri i abrusim birua, wantaim ol meri husat i gat ol pikinini, husat i nidim helpim long lusim ol man i save paitim ol na lukautim ol yet long sait bilong mani. Planti meri i tokim Human Raits Wats olsem ol i stap yet wantaim man i save paitim ol bikos ol i nogat narapela rot long lukautim ol pikinini bilong ol.

Ol nogut pasin olsem maritim planti meri, pasin bilong baim meri, na paitim ol pipel – planti taim ol meri - ol i sutim tok long ol long sanguma i go het na ol i no sekim long Papua Niugini. Wanpela man i save maritim namba tu meri i save kamapim pasin birua na bagarap long namba wan meri. Pasin bilong baim meri i save mekim olsem ol meri i save kamap olsem wanpela samting bilong man, na rausim ol meri long helpim bilong ol famili bilong em, olsem kastom i save mekim we ol i mas bekim ol mani sapos meri i lusim man – taim em i kisim bagarap yet – na planti famili i no inap long bekim ol dispela mani. Sutim tok long sanguma pasin i kamap wanpela hap bilong famili vailens, we ol man i save paitim ol meri i yusim dispela pasin bilong sutim tok long pasim maus bilong ol meri na kontrolim ol meri. Olgeta tripela pasin i kirapim pasin bilong bagarapim ol meri.

Wanpela netwok bilong ol ektivis long kantri, planti bilong ol meri i abrusim famili vailens i stap insait, i wok strong long helpim ol meri i kisim bagarap na presim gavman long rifom o senis. Dispela rot bilong 2013 Famili Proteksen Ekt i mak inap long strong bilong ol.

Ol dona olsem [Australia](#) i mekim bikpela wok long givim mani long ol sevis i stap long ol viktim bilong domestik vailens. Tasol lidasip bilong gavman na karim aut wok i no kamap gut.

Papua Niugini i gat bikpela ikonomi, long ol neturel risos bilong kantri. Gavman i mas dairektim ol mani na laik bilong politik long stopim famili vailens. Gavman i mas hariap na kirapim Famili Proteksen Ekt, na luksave olsem polis, ol prosekyuta na ol kot i luksave long famili vailens olsem kraitim. Em i mas mekim ol sevis i go bikpela bilong ol meri i abrusim birua long famili vailens, na givim hap bilong ol long slip; ol i mas gat rot bilong kisim helpim long lo, kaunseling na kes menesmen; na kamapim fainensel sefti bilong ol meri – na ol pikinini bilong ol – taim ol i painim nupela laip we i nogat vailens.

‘I gat ol sampela gutpela rot we gavman i abrusim famili vailens long sampela yia i go pinis,’ Barr i tok. ‘Tasol trupela rifom i no kam yet. I gat planti moa wok we gavman i mas mekim long lukautim rait bilong ol meri na sanap long wok bilong en aninit long intanesenel lo.’

Ol Stori bilong ol sampela meri

‘Mi go long ol polis olsem 17 taim. Mi go olgeta wik long las mun. Ol i tok dispela em domestik hevi. Ol i tokim man bilong mi long noken paitim mi gen. Mi kisim man bilong mi go long polis stesin na polis tok, ‘Yu gat planti pikinini – yu mas go bek na noken mekim gen.’ Mi laikim ol long kalabusim em olsem long wanpela o tupela yia. Tupela bun bilong mi bruk pinis,’ em i tok. ‘Mi pilim hat long painim kaikai bilong ol pikinini na salim ol i go long skul.’

–Jenelle, i gat 39 krismas, mama bilong 7-pela pikinini, em i go bek gen long man bilong en

‘Em kam long mi na askim mi long slip wantaim mi. Mi tok nogat, bikos mi pilim les. Em i

sutim tok long mi olsem mi slip wantaim ol narapela man. Long 2 o 3 klok moning, em i kisim wanpela hat stik long paia na em i putim go insait long samting bilong mi. Polis i tok ol i nogat kar long kisim em na kalabusim em. Mi go long hap tupela taim. Mi wetim ol polis long tupela de. Mi no amamas wantaim ol polis.’

–*Katherine, i gat 48 krismas, mama bilong tupela pikinini*

‘Ol i holim em na salim mitupela i go long kaunseling wantaim sajen bilong polis yunit. Mipela bung tupela taim. Nogat wanpela samting i kamap. Man bilong mi i go het long paitim mi. Long ai bilong polis em i wanbel long stop, tasol long haus em i no senis. Em i save paitim mi long taim mitupela i save go long kaunseling stap. Mi tokim ol polis em i save paitim mi yet. Ol i tokim em olsem ol bai kisim em go long kot sapos em i no stop. Mi askim ol polis long helpim mi na kisim proteksen oda. Ol i tok ol i bisi.’

–*Kere, i gat 18 krismas, marit long tupela yia, mama bilong wanpela pikinini*

‘Mi tingting long go bek long em bikos long ol pikinini. Em i reipim mi gen. Em i lokim mi long wanpela rum long Fonde na Fraide. Tasol mi ranawe kam aut. Mi laik kisim em i go long kot na lokim em. Mi laik painim wanpela wok na kisim haus bilong mi yet na kisim ol pikinini bilong mi bek. Mi laik stap longwe long man bilong mi.’

–*Grace, i gat 44 krismas, mama bilong 7-pela pikinini, stap long seif haus long taim bilong toktok long em*

‘Mi go long polis tripela taim long 2012 na wanpela taim long 2013. Long tripela taim, ol polis i ringim man bilong mi (husat em polis man tu). Ol i kisim wanpela komplem long namba foa taim, tasol ol i no holim em. Bihain long dispela mi ting, mi no inap kisim helpim. Mi no gat lain bai helpim mi. Mi bin go long supavaisa bilong em na askim em long rausim gan bilong en. Sampela taim mi save pilim, em i pinis bilong laip bilong mi.’

–*Alice, i gat 38 krismas, mama bilong 4-pela pikinini*

‘Mipela i bin komplem na askim mejistret long strong. Ol prosekyuta i no save wok wantaim ol kes gut. Ol penalti i no strong tumas.’

–*Polis Opisa wantaim wanpela speselais famili na seksuel vailens yunit*

‘Lo long vailens egensim ol meri i no strong tumas, long wanem ol man i save go het long paitim ol meri... Gavman i stap longwe long mi.’

–*Wanpela meri i abrusim famili vailens long Hailans*

‘Mipela i no save yusim FPA (Famili Proteksen Ekt). Mipela i no inap yusim FPA sapos nogat infomesen long sasim wanpela aninit long dispela. Nogat wanpela salim wanpela infomesen long mipela.’

–*Polis opisa wantaim speselais famili na seksuel vailens yunit*